



Broj: 01/5-50-1-6-3/07
Sarajevo, 12.3.2007.godine

ZA P I S N I K
3. sjednice Komisije za saobraćaj i komunikacije,
održane 12.3.2007. godine

Sjednica je održana 12.3.2007., s početkom u 16,10 sati.

Sjednici su prisustvovali članovi Komisije:

- | | |
|----------------------------------|-----------------------|
| 1. Branko Dokić, predsjedavajući | 6. Snježana Rajilić |
| 2. Sadik Sado Bahtić | 7. Mehmed Suljkanović |
| 3. Selim Bešliagić | |
| 4. Savo Erić | |
| 5. Šemsudin Mehmedović | |

U ime Državne regulatorne komisije za električnu energiju sjednici su prisustvovali: Vladimir Dokić, predsjedavajući Komisije, Mirsad Salkić i Željko Topić, članovi Komisije.

Sjednici je prisustvovao i privremeni sekretar Komisije za saobraćaj i komunikacije Ahmed Jalovičić.

Predsjedavajući Branko Dokić predložio je sljedeći

D N E V N I R E D

1. Usvajanje Zapisnika 2. sjednice, održane 27.2.2007.godine,
2. Razmatranje Izvještaja o radu Državne regulatorne komisije za električnu energiju u 2006.godini,
3. Prijedlog plana rada Komisije za 2007.godinu,
4. Ostala pitanja.

Dnevni red jednoglasno je prihvaćen.

Ad. 1.

Na Prijedlog zapisnika nije bilo primjedbi, pa je Komisija jednoglasno verificirala Zapisnik 2. sjednice, održane 27.2.2007.godine.

Ad. 2.

Predsjedavajući je podsjetio da se na prošloj sjednici vodila rasprava o Izvještaju o radu Državne regulatorne komisije za električnu energiju u 2006.godini, da je zaključeno da se detaljnije izučiti Izvještaj i da se eventualno postave neka nova pitanja, kao i da se usvoje određeni zaključci.

Mehmed Suljkanović istakao je da jedino Bosna i Hercegovina osim Srbije i Crne Gore nema usvojen Program zaštite socijalno ugroženih kategorija stanovništva, tako da će se doći u situaciju da jedan broj potrošača neće moći izdržati povećanje cijena. Pretpostavlja da nema odziva vlada s ciljem zaštite potrošača, a podaci govore da je cijena električne energije u Bosni i Hercegovini najmanja u regionu.

Mirsad Salkić smatra da DERK treba da se bavi pitanjem zaštite kupaca i da svoj doprinos, a da je program određivanja Blok tarife najbolje rješenje u ovom trenutku, jer program predviđa da se za manju količinu utrošene energije određuju manje tarife. Vlade entiteta, kao i entitetske regulatorne komisije dužne su rješavati ovo pitanje, a sada je teško brzo napraviti Program zaštite socijalno ugroženog stanovništva, pa je Blok tarifa trenutno najbolje rješenje. Prema njegovim informacijama, ne bi trebalo doći do povećanja cijena električne energije, a jedino je upitan stav Elektroprivrede Hrvatske zajednice Herceg-Bosne.

Predsjedavajući je mišljenja da bi trebalo donijeti zaključak da je potrebno izjednačiti cijene električne energije sa zemljama u okruženju, kao i da je neophodno da neko plati više, kako bi neko mogao platiti manje.

Vladimir Dokić naglasio je da sve studije ukazuju na potrebu povećanja cijena domaćinstvima, ali da će za izjednačavanje cijena s industrijskim potrošačima trebati više vremena. Što se tiče indikativnog plana, istakao je da se taj termin nije upotrebljavao u praksi, nego u razvijenim kapitalističkim zemljama za slučajeve kada država treba da intervenira s ciljem skladnog razvoja određene djelatnosti.

Mirsad Salkić ukazao je da je kod sve tri elektroprivrede cijena za domaćinstva niža nego što realno treba biti, da komercijalni potrošači imaju znatno veće cijene, a industrija ima cijene realno prema troškovima. Naveo je i podatak da su u prošloj godini tri elektroprivrede poslovale pozitivno.

Predsjedavajući je mišljenja da je kompleksno pitanje kako pomoći industriji, te konstatirao da se ne ulaže dovoljno u nove izvore energije, a da je višak električne energije posljedica zantnog smanjenja kapaciteta industrije. Smatra da treba sugerirati Vijeću ministara BiH da pokrene pitanje Programa zaštite socijalno ugroženih kategorija stanovništva.

Selim Bešlić istakao je da su entiteti i kantoni odgovorni za socijalne programe, kao i da se ne smije prešutiti problem zaštite socijalno ugroženih kategorija stanovništva.

Šemsudin Mehmedović ukazao je na činjenicu da mali inustrijski potrošači imaju najnepovoljnije cijene električne energije, te da zbog toga posluju na granici rentabilnosti. Smatra da regulatorne komisije treba da rade na edukaciji potrošača, kako bi oni imali što manje troškove.

Mirsad Salkić mišljenja je da Studija razvoja energetskog sektora koju finansira Svjetska banka treba da preraste u strategiju razvoja energetskog sektora.

Šemsudin Mehmedović istakao je da treba imati ujednačen pristup prema privatizaciji energetskog sektora, te da još ima zemalja koje nisu privatizirale energetske potencijale.

Predsjedavajući podržava stav da se ne privatizira većinski energetski sistem, te da je potrebno podstaknuti investicije u oblasti svih izvora.

Mehmed Suljkanović ukazao je da je potrošeno dosta novca za izradu Strategije energetskog sektora u Federaciji BiH, kao i da treba inicirati izradu strategije energetskog sektora na nivou Bosne i Hercegovine.

Savo Erić smatra, ako elektroprivrede ostaju u državnom vlasništvu, da im je potrebno omogućiti aktivnosti na izgradnji minielektrana, da se ne smije dozvoliti da zavisimo od isporuka plina, te da povećanje proizvodnje električne energije treba da bude podstrek za daljnji razvoj Bosne i Hercegovine.

Komisija je u raspravi o ovoj tački dnevnog reda usvojila sljedeće zaključke:

1. Uzimajući u obzir činjenicu će Bosna i Hercegovine morati ući u fazu usklađivanja cijena električne energije sa zemljama u regionu, predlaže se Vijeću ministara BiH, Vladi Federacije BiH i Vladi Republike Srpske, da, u saradnji s Državnom regulatornom komisijom za električnu energiju, Regulatornom komisijom za električnu energiju Federacije BiH i Regulatornom komisijom za električnu energiju Republike Srpske, sačine Program zaštite socijalno ugroženih kategorija stanovništva, s ciljem njihove zaštite.

2. Potrebno je što prije završiti izradu Studije o energetsom sektoru Bosne i Hercegovine, te se sugerira Vijeću ministara BiH, Vladi Federacije BiH i Vladi Republike Srpske da, na osnovu Studije, izrade strategiju razvoja energetskog sektora, kao razvojne šanse Bosne i Hercegovine.

Ad. 3.

Predsjedavajući je istakao da Prijedlog zakona o Agenciji za informaciono društvo BiH nije usvojen u prošlom mandatu zbog predviđene pozicije CIPS-a unutar Agencije, te smatra da bi trebalo sačiniti poseban Prijedlog zakona o CIPS-u, jer je to sada velika institucija. Mišljenja je da Ministarstvo komunikacija i prometa BiH nema trenutno kapacitet da odgovori predviđenim obavezama i da im treba pomoći, te je potrebno formirati tijelo koje bi činili predstavnici Parlamentarne skupštine BiH, Vijeća ministara BiH i entitetskih vlada, koje bi se bavilo problemima razvoja informacionog društva.

Na prijedlog predsjedavajućeg, usvojen je sljedeći zaključak:

Traži se od Ministarstva komunikacija i prometa BiH da u što kraćem roku izradi i uputi u parlamentarnu proceduru Prijedlog zakona o Agenciji za informaciono društvo BiH.

Sadik Bahtić ukazao je da je CIPS jedina institucija koja je dobila negativan izvještaj Ureda za reviziju institucija o radu za 2005. godinu, te da je stanje u CIPS-u haotično.

Savo Erić istakao je da je potrebno uspostaviti što bolju saradnju s ministarstvima, kako bi Komisija dala svoj doprinos u ostvarenju konkretnih ciljeva.

Nakon što je predsjedavajući zaključio raspravu, Komisija je jednoglasno prihvatila Prijedlog plana rada Komisije za 2007. godinu.

Sjednica je završena u 17,20 sati.

SEKRETAR KOMISIJE
Ahmed Jalovičić

PREDSJEDAVAJUĆI KOMISIJE
dr. Branko Dokić